



著老書堂集卷之三

巳巳秋
至壬申

臨潼

張世進

軼青

與樊榭同舟之西湖渡江作

勞生六十漸平頭才作西湖放浪遊
獨往怕招生客誚
同來喜與故人謀
閑身暫釋周何累
送客爭方李郭舟
最喜澄江如練外
夕陽山色一行秋

和作

厲

鶚

樊榭

依依老柳拂橋頭
我賦將歸君始遊
風月西湖如有待
煙波東道若為謀
烏絲剡紙蠶頭字
白紵吳歌鴨嘴舟
應是高人情調逸
笛聲吹過一江秋

嘯齋善長笛中
流為余作三弄

五人墓

東廠逮官稱聖旨目中豈復有天子五人聞之髮上指
立斃一校如一蟻明知此舉無生理爲吏部亡所願耳
逆璫勢敗冰山地五虎五彪皆已矣五人之墓巋然峙
衣冠過之頽有泚嗚呼五人長不死

吳江道中

清絕吳江縣舟行入畫圖有田皆種稻無港不通湖楓
冷霜初信鱸香酒可沽寬閑勝肥膩回首笑姑蘇

埭市

村市無多地南遊此乍經桑圍千畝綠藤絡一橋青蛩
語機聲急魚吹水氣腥能文茅順甫留得舊門庭

初至西湖

山水若友朋貴合不貴離西湖冠天下乃以匯聚奇中
開大圓鏡環列千蛾眉波底浸黛色峰顛引華滋我來
策遊事正與清秋期一舟載行李徑入青琉璃幽處未
細領勝槩已略窺憶在汝陰郡有湖清而瀾名字亦忝
竊歐蘇屢游嬉了無一拳石但有千頃陂兩地試相較
判若東西施吾生近六十頻年苦奔馳若論濟勝具頗
異少壯時匹如黃髮叟始遇紅粉姿潁濱久留滯胡不
彼易茲我友善寬譬謂我殊弗思世味老方淡遊趣老
乃知自今身到處搜剔期無遺斯言誠可味斯遊信非
遲

宿清隱菴

小寺斷橋西垂簷竹樹齊空山蓮漏寂徹夜草蟲啼自
覺宵眠穩不知秋月低人家在何處隱隱一聲雞

由靈隱登韜光絕頂

浮雲弄輕陰淡日媚清曉亟爲靈苑遊邱壑入門好稍
前臨冷泉絕境世間少水聲天籟鳴崑穴鬼工巧竭來
孤亭中清景更空杳梁間波紋搖檻外峰影倒時於綠
樹陰隱見蒼鼠黠此間無六月何處覓三島平生塵土
胸到此淨如掃惟思終日坐便擬於中老韜光在寺後
勝處引幽討但循入筧泉即是登山道道旁何所有檀
欒竹四遶只聞風蕭蕭不見日杲杲翠色攬未窮置足
忽雲表湖光開瀲灩江色明滄漾下視百尺竿偃亞若

叢篠一日探靈奇終身貯懷抱縱歷數十年追憶猶了
了

八月十四夜湖邊獨酌

朝遊足力疲月好不容睡獨攜一尊酒靜與澄湖對茫
茫千頃陂變作光明地雲來鏡開闔風起金破碎絕無
冷螢飛但有涼蛤吠勸影杯未揮極目心已醉吟侶呼
不來錢唐門早閉

謁和靖先生祠墓

墓壘孤山石祠因處士家烝嘗非子姓守護有煙霞鶴
已隨人去花猶照水斜清風自千古軒冕是泥沙

于忠肅公墓

松柏凋零馬鬣存客來檇棹弔忠魂救時宰相知謀國
復辟功臣讓奪門居者不能爲叔武寡人空自憾原繁
棲霞嶺下南山麓兩地同埋萬古寬

由風篁嶺至龍井

我來風篁嶺不見青琅玕微聞亂石底幽響鳴佩環登
登入古寺一泓深且寬始知澗道水此處乃其源居人
賤稼穡種茶滿巖巒清秋氣已肅白花開未殘想見穀
雨時焙煙浮林端名泉與佳茗茲地兼二難何當攜石
鼎就此煮龍團

遊虎跑泉

峩峩大慈山深處藏古寺寺門石橋橫過此入蒼翠老

樹不知年壽藤尤可異離立尋丈餘乃向喬柯寄不知
芽蘖時何術能拔地蕭條紺殿旁冷冽清泉沸人言山

中水堪與白沙配

南山虎跑北山白沙爲諸泉之冠

嚮不遇中公安得感異

類方池承其流朱鯉泳其內山僧如野猿見客思走避
問以祖塔名曹然不知對已快雲液嘗何用風軒睡歸
途木葉飛疑有於菟至

與大恒讓山兩上人茶話偕至小南屏觀司馬

溫公米襄陽摩崖書

寺分東西林人是大小朗何期一日中頓有詩僧兩綠
茗劇談消翠微拾級上摩抄涑水碑隸字大於掌姓名
云附會真贗付臙肱且來虛亭坐細領秋氣爽亭外即

琴臺顛米昔欣賞惜無七條絲可令衆山響二老住煙霞孤生墮塵埃此間片刻留忽作三生想勝地倘重來禪關期再訪斜陽湖面鋪分手各快快

浙江觀潮歌

錢塘江水鏡樣平赭龕兩點浮遙青我來八月月既望人言當午潮始生波恬不見浪婆怒帆穩正有漁舟行遲之又久意已懈海風吹衣肌骨清起看天水接連處爛銀一道中間絙計程約在百里外飯頃已與隄石爭神騰鬼趲輸迅疾天關地軸疑崩傾濤頭似插十萬鼓用皮囊美句弩手何懼三千兵跳珠作雨冷濺面迴瀾噴雪光搖晴先時十里語如沸此際萬口瘖無聲不知吳兒膽

許大捩柁反以船頭迎我我鹹浪到何許一時便可趨嚴陵天下奇觀孰逾此老來創見喜且驚遊人散盡未忍去西興隔岸思揚舲

顯功廟

神姓岳名瑀爲臨安府吏金人犯境輸家財募勇士三百人迎敵死戰闔境以安咸淳中賜廟顯功封忠翊侯

三百孤軍障虜塵荒祠寂寞聖湖濱誰知碧血丹心外更有英雄姓岳人

留別西湖

十日優游似散仙等閑拋却好林泉忽忽知被山靈笑碌碌難辭世網牽幾首新詩當行李滿湖涼雨送歸船殘年腰脚還羸健更與煙波結後緣

夜行贈舟子

夢裏湖山尚有情
吳歌聲急櫓牀鳴
乃公自覺歸心懶
辛苦勞君趁夜行

初冬送程泚江太史遊楚

此去程途我最嫻
離筵追憶尚班班
平時澗道三冬路
落日郵亭四面山
上馬自誇身矍鑠
杜門翻愧性疎頑
殘年風物鄉關好
莫待江梅放後還

輓方環山

生前風味逼天真
歷落欽奇可笑人
宏辯發時鬚似戟
青山寫出筆無塵
論交自昔惟求舊
入夏憐君不食新
贈我剡藤猶挂壁
一回相對一沾巾

篠園蓮塘新製小舫分得先韻

種得芙蕖已有年
閑情添製檝頭船
繫時只在朱闌畔
吹去還依白鳥邊
蓬背較來花恰並
池心穿過葉微偏
紅衣落後知無用
定學張融岸上牽

閨重五集晚清軒

涉夏兩月餘計日始逾半
重午欣再逢未覺風物換
戎葵花漸高海榴色初爛
須知草木情遇閨每遲晏
盍簪得良朋解帶坐高館
蒲酒復盈杯角黍亦堆案
吾儕惜景光借事作遊宴
矧茲令節重百歲能幾見
謀歡既有名揮爵任無算
薄暮捲簾看新蟾一鉤燦

秋苔

蒼蘚春來合
經秋綠意存
清霜危石底
涼雨古牆根
密

覆陰蟲穴疎添落葉痕蕭晨無客至滿地不開門

送五姪歸里營葬

聞別輒不樂況當歸舊林往來三月路離索一冬心大
事爾難緩鄉思吾亦深眼看成去住執手意沉吟

白華樓秋眺以與客攜壺上翠微分韻得與字

結樓空山中放眼了無阻屋後枕岡巒舍前面場圃遶
籬多拒霜抽花靜而嫵我友無事時來作秋光主更邀
閑客過共把危欄撫雲陰吹欲斷江岫近可數微吟入
商飈夕陽下平楚秋水傍莊門歸舟恣容與

九日集平山堂以清氣澄餘滓杳然天界高分

韻得杳字

茲晨例風雨喜見朝日杲崇岡近易攀秋色遠逾好披
襟坐堂隅送目過江表頻經素節來未覺青山老緬懷
六一翁風流去如掃何須弔陳迹且復醉清醪霜嚴鐘
韻清天濶鴈程杳對景不爲歡黃花笑枯槁

將往棲霞不果

棲霞寺側好巖阿準擬清秋載酒過聞說六朝松影下
近來山鳥避笙歌

送懈谷入都

馬首楓林葉尚酣此行差覺道途諳黃河水落敲冰渡
青嶽峰高帶雪探定有新詩傳日下可因舊雨憶江南
長安勝槩都看遍歸向西窓翦燭談

賦得堠子再送懈谷

閱盡行人離別情太平烽燧久無驚長亭短驛分雙隻
古道斜陽管送迎戍卒有樓頻守望記程無鼓亦分明
知君細把吟鞭數倩作郵籤入帝京

顧郎曲

顧郎五十鬚鬢兼我昔見之美少年短髮才如車子幼
嬌喉不數順郎圓喧闐廣座觥籌舉走上紅茵盡無語
擅場最是梨花槍絕技渾同柘枝舞顧郎之母本女優也梨花槍一折其母所授諸伶無
能習之者癡兒買笑揮黃金黃金買身不買心未終東舍當筵
曲已有西家秉燭尋曦軒月駕如梭疾老却名花春幾
日青蚨散去肯重來雪刺才芟行復出繩樞甕牖短牆

隅剛與儒家共巷居覲面依稀麤可識自言困苦乞為
奴顧郎作計真成錯視爾形衰筋力弱喬氏高安孰見
憐王家便了難如約我亦生平喜曼聲尊前擲笛老猶
能好天良夜相過易且與時時唱渭城

正月五日與五姪同過讓圃

東風隨客轉江鄉時五姪甫自關中歸無事同過舊草堂記得別時
驚落葉又來樹底話斜陽老猶病酒翻成健閑即尋春
自笑忙愛我疎頑除爾外竹中誰與共相羊

有勸余復應鄉舉者賦此荅之

村粧不解趨時世老馬何曾識路程自昔雲霄資羽翼
豈容風漢廁科名衰年墨水難重飲今日孩兒定倒繡

只合石田茅屋底閑賡擊壤詠昇平

上元前一日集晚清軒時馬嶰谷樓于湘歸自都門陸南圻歸自黃海五姪歸自秦中

同來高館擘吟箋積雪初消買夜前舊侶多從千里返新蟾祇欠一分圓坐依綠酒紅燈畔話到山程水驛邊我是江南倦遊客但將離緒說殘年

上元日兒子四履與諸甥聚飲獨酌率成一絕

句

少年場裏自嫌身孤影唯宜樺燭親不是老夫逃席慣

尊前中表已無人

唐彥謙詩眾飲不歡逃席酒

著老書堂雨中看梅花聯句

殘香留得草堂前

吳廷采

又值霏霏暮雨天

余夢易

拭

汗何郎添粉澤

張四科

掩啼江女倍清妍

張世進

韶光

漸屬繁紅管

廷采

冷艷難拚此夜捐

夢易

同是傷春惜

花侶

四科

須教一滴一杯傳

世進

上巳日偶成

寂寞牆東野老家春光強半去天涯疎梅縱有餘香在不及時新薺菜花

四月一日泛舟紅橋四首

送罷殘春意黯然一篷閑泛古城邊東風莫道全無力猶送楊花亂入船

翠輦曾經此地來去年今日六龍迴風亭月榭還如

舊花援齊開錦被堆

風定惟憑弱纜牽平山堂底小留連一岡涼翠一溪綠
染出空明上下天

吟客尋詩共載過無心鬪酒與聽歌詩成却彷彿錢唐例
一笑回船日未蹉

杭有背馱紅日進錢唐
之諺樊榭杭人故及之

自營生壙作

吾生忽六十甲子計已周縱歷年百歲終歸土一杯欣
茲先壙側有地坦且幽相離數武近祇隔方塘流生悲
缺溫清死願依松楸魂魄誠戀此窀穸將焉求緬懷身
後事古人迴不侔蘆蔭藉上下石槨窮雕鏤豐為骸骨
累薄貽子孫憂但使絕狡兔何須問眠牛役夫具畚鍤

治地除薪樵白石識坎穴青烏免咨諏時復攜壺觴於
焉肆吟謳非狂亦非達無歡復無愁旨哉表聖言此中
寧暫遊

四月十日著老書堂坐月

入夏晝景長月出天未夕麗空知有光映地了無迹須
臾四際昏漸放一庭白際此可憐宵惜少不速客軸簾
坐虛堂心境兩寂歷影蛾有小池跳魚時策策

書尋陽長公主墓誌銘後

有序

志稱主爲五代時吳太祖楊行密女年十六適舒
州刺史彭城劉公而遺其名生男女十二人以順
義七年薨年三十八乾貞二年葬江都縣興寧鄉

袁墅村稱長公主蓋楊溥時所封也作誌者閩縣
丞危德興乾隆中村農掘地得石今藏烏程令羅
君素心家余友厲君樊榭爲作跋尾約同人賦之
以備揚州掌故云

唐末羣雄揭竿起化源虎視蕪城裏宮中有女賦桃夭
道旁觀者歌穠矣芳時二八締良緣子女繩繩遶膝前
簫聲正喜諧雙鳳曲調俄翻歎百年劉郎幸坦東牀腹
僅著官階兼氏族迄今禁鬻竟無名可預英雄三十六
興寧鄉近蜀岡頭鬱鬱埋香幾百秋芳魂不共東風轉
故事徒因片石留拓本摩娑增太息十國興亡才頃刻
當時黃屋幾帝王詎數紅顏一巾幗主也生當無事時

瑟瑟靜好唱還隨生前榮寵知無匹身後邦家漸不支
老臣父子何驕甚繼體三君時懍懍興王自擬隆準公
嗣主堪呼狗脚朕可憐遜位徙丹陽子姓同時赴北邙
寶硯翠瓶都不守玉魚金枕幸無妨死葬揚州真得所
故宮免見生禾黍假饒白首到昇元流涕當如永興主

真州湄菴

遙望綠陰合到門紅板橋四圍千个竹一日兩回潮山
鳥逢齋下江魚對酒跳迴舟趁新月風荻晚蕭蕭

小池

竹下數弓地閑情更鑿池風波不生處霜鬢獨窺時狹
可容魚婢深纜浴雀兒水從簷溜積荷用瓦盆移漫引

流杯興原無結網思留教印明月莫使翠萍滋

述夢二首 有序

七夕後大雨連綿與五姪不相見者旬日夜夢其
蟬書樓下西偏闢一小門啟扉而入有齋三楹前
後梧竹森列映窓戶皆作綠色右爲長廊迤邐而
南至一小軒軒外臨大池石橋宛轉約數十武達
一亭亭在池心寬廣可容數十人碧闌環之俯視
翠蓋朱華燦若雲錦遶池皆長隄隄上繚以粉垣
覆以垂柳予坐亭中聞游魚澆潏聲意欣然樂之
顧謂五姪曰有此銷夏處宜爾之杜門不出也相
與一笑而寤寤後池臺恍然在心目間因成二斷

句以示五姪自念六十平頭萬緣皆淡所不能忘
情者一邱一壑耳然泉石煙霞昔人自以爲膏肓
痼疾亦可知其爲生人之一病而非達者所宜繫
懷也如吾之因想而成夢因夢而成詩癡不已甚
乎夫知爲夢而說之謂之癡也可知爲夢而向不
癡人說之謂之非癡亦可時乾隆壬申七月十三
日

宅畔池臺處處幽阿宜煙舍免他求異時真有爲園地
癡叔胸中樣本留

夢裏留連覺後思人間幻境略如茲平泉金谷多興廢
不過黃梁飯熟時

聽余研南彈烏夜啼曲

秋風颼颼秋雨零余生素琴爲我鳴大絃哀以怨小絃
淒而清爬沙不似大蟹行分明夜靜慈烏聲慈烏啞啞
止還作老烏化作遼東鶴口吻流血呼不來世上孤兒
雙淚落淚落兮難收託絲桐兮寫憂恍宵分兮寂寂聽
枝上兮啾啾生從何處傳茲譜響入秋更亂風雨四座
聞之意酸楚此聲對我休重鼓我是老烏舊朋侶曾向
林間共蠻語

苦雨

多時愁不雨一雨遂連綿置足無乾土當頭是漏天市
門船可入鄰舍釜多懸却憶浮雲內今宵月尚圓

喜晤方息翁

常恨同時不竝遊相逢喜值菊花秋清詞麗句盈緗帙
錯節盤根到白頭一瓣心香承秀水二分月色愛揚州
因君却動人琴感四海曾經識子由

謂令弟南堂

爲方息翁題曝書亭留客圖

沈太常宗敬畫

龍眠山人頭雪白曾作駕湖門下客奉常煙墨著無多
賓主風流摠傳得曩時太史主騷壇每遇高朋始前席
宏景樓中豈易登崔樵室內真難入君爲永叔老門生
不愧延陵舊相識慚予後進學推敲未向先民受繩墨
視翁已是丈人行何況竹垞年過百擔簦恨不及當年
讀書猶欣有今夕淒涼聽說曝書亭祇剩煙篁與風荻

哭樊榭二首

休言識君晚交誼十年深當代風騷手平生山水心當
筵賡險韻裏藥赴幽尋把臂今無日遺編忍重吟
斯人誠可慟才調眼中無舌吐粲花論胸藏記事珠詩
仙歸上界雲物冷西湖八十慈親在誰為返哺烏

題洪曲溪半隱齋

卜築閑坊竹戶深不依朝市不山林好花肯放全枝露
明月常分一徑陰惜少鴻光歸老伴曲溪喪偶後不更娶誰同沮溺
耦耕心與君百歲俱過艾咫尺牆東莫厭尋

賦得以詩為佛事

夙聞真實義慧業可生天不習鐘魚課祇參文字禪瀾

翻千偈並風雅一燈傳味耐紅婆苦

紅婆子味苦佛經以喻衆生惡趣見寒山詩

思

同穗子圓箭鋒機要捷蔬筍氣宜蠲小乘殊堪笑殷勤

禮浪仙

順治中京師有鬻故書於市者內夾一刺書客

氏拜寶應朱秋崖以三錢得之賦客氏篇事

載新城王尚書池北偶談朱詩今不可見桐

城方息翁要同人為詩紀之因賦長短句四

章

客氏拜墨猶新當時名紙投何人定是東廠兒決非東

林臣

客氏拜吁可怪稱名胡弗以子代癡兒侯國興是時想

酣睡 國興昏愚每對客
輒欠伸入夢鄉

客氏拜祇三字三字之榮華袞視欲以詒子孫敢不藏
篋笥

客氏拜重如許鳳詔鸞書輕一羽送却明江山不獨文
八股

題文待詔秋山雨霽圖二首

低雲貼地明於水遠樹排空密似城記得秋原風日好
此身曾在畫中行

剩將餘事寫青山高座騷壇不汗顏如此畫師何處覓
果然難入翰林班 徵仲為待詔時一詞林曰吾
輩衙門中豈可容畫師入耶

聽息翁談春及堂集中往事二首

舊事紛紛耳未經寒燈影裏話星尾天教一老存文獻
莫作尊前漫語聽
春及堂中絕妙詞句中有眼近方知便當速付鈔胥手
編作先生自注詩

息翁於韓江雅集諸君或目之為佛或目之為

菩薩或目之為維摩詰或目之為揭諦神蓋
各就其語默動靜之殊而為之喻也一時雅
謔吾姪 四科 以長句紀之余亦戲次其韻呈

息翁

努目低眉眾態殊酒徒豈合濫齊竽須知釋氏人天果
略似詩家主客圖千佛名經從見擯四歡喜法未全無

他時得句先呈處自覺衣中有意珠

原作

張四科

成佛生天事本殊詩中主客異吹竽直將洛社耆英
會平上真靈位業圖菩薩忘言猶未得金剛努目固
應無何當龍樹前頭坐各現摩尼五色珠

過曾襄愍公墓

黃葉西郊路孤墳入望遙荆榛荒逕合勳伐斷碑標松
吹含商氣樵歌代楚騷精忠昭後世左計慨前朝戰守
心無主貞邪聽易搖河湟忘地險巢穴委天驕節使重
規取邊功匪倖邀酬知身不顧積毀骨能銷誰引強鄰
入翻疑長子挑股肱方水火將相孰和調名未燕然勒

魂先東市招自誅檀道濟空擬霍嫖姚長劍何曾試良

弓忽已弨山阿雖有託褒贈轉無聊舊與聞孫識公八世孫曰唯

與余交猶矜世閥超可憐先壟外四壁久蕭條

同人作消寒詩會息翁畏寒不赴以詩招之即

次其辭會原韻

先生作詩如作劇嬾向行閒守繩尺愛吟長句掃千軍
每讀清風生兩腋近依寓舍火爐頭怕作灞橋驢背客
誰知此地足簾帷相去原無多巷陌錫如白雪堪膠牙
酒似青州能下鬲過從宜作深夜談唱和未愁強韻厄
座無匡鼎難解頤論少戴憑誰奪席公真健者秉麾旄
僕乃小夫甘辟易揔期身老愈堅強肯以氣衰遭笑啞

杜門高枕神雖恬對客揮毫情更適好聽得意唱嗚嗚
絕勝當筵歌昔昔友朋文字輔頰齡試較參苓差有益
吾曹合并非偶然疑是同時上清謫翁如謂我狂而癡
速來罰以深杯百

史閣部墓

相國衣冠此地藏望中荒壠舊危疆北門鎖鑰資萊國
南渡君臣忌李綱已識處堂同燕雀猶思奮臂作螳螂
忠魂莫道無招處幾點梅花萬古香

木蘭院

王郎題句此祇園壁上紗籠已不存自昔戛羹聞嫖叔
幾人進食念王孫塵埃宰相原難識肉眼閻黎那足論

若使休休多雅量合將一飯感前恩

銀槎歌爲懈谷昆季賦

敝居華館祇隔街文字之飲吾輒偕宵分示我銀鑿落
夜氣白若新磨揩似蕉似荷似瓜片匪桴匪船匪枋簿
虬枝疑是萬年樹樵斧落自千丈厓青銅柯冷柏不葉
屈鐵幹老松無釵誰歟坦腹臥其上欲遊天漢窮津涯
元時製者朱華玉意匠之巧不可階金精木德融作一
孰云相尅情睽乖翦燈諦視多窅奧穿穴盡使通根荄
奚奴試遣酌浮蟻宛轉而入同盤蝸允宜珍重貯醺醪
寧容猥褻傾茅柴本朝孫高遞藏弃上溯虞揭堪推排
迄今完好未羽化我友得之羅高齋鬼神想亦惜所與

肯以美玉投池蛙緬思博望馳絕域一人封侯萬衆骸
鑿空好奇非我事枕糟藉麴真吾儕諸君總以小戶謝
渴羗弗勞觥使差酒映朱提色逾豔觴非崑崙味亦佳
捲簾歷歷星挂戶舉頭皎皎月貫懷醉餘走筆賦長句
瓦缶豈必宮商諧

著老書堂集卷之三

著老書堂集卷之四

癸酉至
甲戌

臨潼 張世進 軼青

薄暮坐讓圃梅花下二首

苔階印遍筍鞵踪又爲梅花策短筇坐到日斜啼鳥歇
冷香叢裏一聲鐘
春雲漠漠護柴扉靜戀繁香未擬歸明月不來閑客去
一林寒玉自相依

荅方息翁留別即次原韻

詩酒平生事寧爲身後謀醉鄉銷日月韻語愧陽秋翁
去誰青眼吾衰已白頭相思不相見愁更倚江樓

三月一日集榮木軒作清明

風雨朝來喜盡刪蕭然相對竹扉間坐聞古調彈流水
臥看新煙起博山百五日同春夢短兩三人似野僧閑
不知第幾橋邊柳冶葉倡條最可攀

送方息翁歸桐城

半年花月喜從遊愁聽歸期近麥秋一代騷情兼賦手
又分楚尾與吳頭清吟不是無同調老氣誰堪橫九州
翁未衰頽吾健在休言白首見無由

馬車為嶰谷賦

南車服以人北車服以馬南車利仄徑北車利平野輪
輻異隻雙地用不相假夫君遊京師車制愛都雅御之
歸揚州無事時炙輶東風二三月沙路坦且夷桃花列

步障菜花鋪地衣駕轅一欵段操轡一小奚車中帶書
卷車後挂偏提山椒與水滸遠近隨所之春郊多士女
相逢笑而嘻南人詫為新北人見如故我家古新豐每
用代緩步謁來大江濱舍舟即乘輿輿無偃息樂舟有
風波懼惟茲下澤車頗協幽人趣儻君不出門借我尋
詩去

六弟宅看花

當年手植牡丹叢辛苦移來喜阿戎時序又逢三月暮
高低還放一欄紅荒園易主渾閑事今日看花是老翁
問訊猶欣腰脚健不嫌居址判西東

有所思

有所思所思竟爲誰豈無平生友乘車戴笠今非偶豈
無傾蓋交推襟送抱殊寥寥朝搢頤暮抱膝借殘編消
短日嗟哉陳人呼之不出

初夏陪沈歸愚先生行菴讌集

蓬萊仙客愛逍遙閑館追隨逸興饒不向天邊依日月
却來江上侶漁樵吟成白雪詩難和說到青山酒易消
是日先生劇談
黃海天台之勝光福楊梅猶未熟南風且緩整歸橈

城南看芍藥三首

淡紅香白總成塵獨有將離色斬新趁蝶隨蜂閑不得
惜花兼爲惜殘春
聲價都因好事增朝張翠幕暮紅燈洛花一事須輸却

不受人閒富貴稱

拄杖敲門到處忙劇憐浩態與狂香此花看罷容吾嬾
臥對綠陰清晝長

書阮亭先生感舊集後

尚書老去念朋儔零落清詩篋底收截取一方都是錦
彙來千腋始成裘山川秀氣於中聚生死交情仗此留
謀付棗梨垂不朽遺編賴有替人搜

集爲盧雅雨
先生校刊

孔北海祠

荒祠肅拜想平生崑玉秋霜比潔清言孫去聲豈忘東
魯訓身亡正坐北辰名臨危曾否思脂習配食還應祔
彌衡此際春秋一尊奠更無賓客座閒盈

蕭孝子祠

剗肝知必死不忍死其親舉世誰無母如君定幾人毀傷非聖訓感激見天真寂寞荒祠下千秋涕淚新

冰盆聯句

皎皎出凌陰張世進滿鑑備暑用圓如却月形閔華磊

若怪石供邗須玉壺藏張四科莫擬金槃頌儲久鋒稜

刃余夢易視徹表裏洞不使見晷消世進或慮融風動

行空大火微華入室太陰重聽想狐綏綏四科語恐蟲

曹曹宋宮疊成山夢易楊家鏤作鳳撫時寧澤堅世進

知寒匪餅凍酒笑田家盛華水宜化生弄沁肌忘夏五

四科回首憶冬仲拽牀海淀危夢易擊盞京塵哄長河

流煙漸世進曉樹結霧松剛別籠爐俱華修遇浮瓜共

懷同思遠清四科抱異勾踐恫北窓晞髮餘夢易太華

入涼夢世進

立秋日作

世間除却無情物誰對西風不黯然豈為蕭條悲節序

祇因搖落感華顛消磨舊雨兼今雨多少蟲天與鴈天

今夜新涼生枕簟且乘微醉覓安眠

早秋僧房

塵中殘暑在閑叩遠公廬滿院古苔合一窻修竹疎高

空過雷雨涼氣入鐘魚多事傷搖落禪心自晏如

秋空

露坐閑翹首太虛如此清纖塵原不到涼雨況初晴肅
肅有霜意冥冥是鴈程轉疑寥廓內何處起秋聲

城南秋泛四絕句

秋來無處不清妍咫尺城南地更偏一片白蘋紅蓼上
粉囊雲靚碧羅天

一棹才將一客容疎疎分占碧蘆叢西風送到無凡句
知落何人艇子中

寸寸涼波沁客心更無遊舫此中尋舟人倚楫知相笑
不聽清歌聽水禽

回船漠漠水煙昏向晚漁家早閉門行到紅橋秋意少
角燈星聚酒人喧

秋荷

吳娃新上采菱舟寂寞蓮塘冷白鷗嬌靨已隨流水去
苦心空向綠房留最憐颯颯西風影猶帶蕭蕭暮雨愁
莫說舊時雲錦樣讓他紅蓼媚清秋

籬門

四圍編枳棘終日掩衡茅漠漠白雲護陰陰綠樹交靜
無租吏打閑有野僧敲自得幽棲趣朱扉莫見嘲

五君詠

胡中丞 期恒

中丞真偉人爲國作屏翰一蜚致雲霄十載飽憂患歸
無負郭田老據讀書案自云入世來得力在爰象

唐太史 建中

太史未登科已擅文譽早春明拂袖歸永謝長安道尊
空語不休燭跋詩未了客況冷於冰終愛江南好

方上舍 士庶

髯兮昂然來望之意先快清堅五字詩漫汗一筆畫哺
啜亦可觀禮法殊不耐手蹟散人間風流邈難再

厲孝廉 鶚

誰歟號書癡我友太鴻是製錦素弗嫻牽絲良可已孟
郊以詩鳴伯輿為情死痛殺北堂親閑却西湖水

姚秀才 世鉦

書生例薄命意田乃其尤經籍空拄腹儒冠終戀頭生

以貧為累死緣藥悞投從今采芳者休向白蘋洲

謁金龍四大王廟 有序

神謝姓諱緒行四錢唐人隱居金龍山宋亡
投茗水死鄉人咸夢其為神明太祖取臨安
見神金甲橫槊於空中助戰嗣後屢著靈異
天啟四年蘇茂相督漕水涸舟不前神降言
為我請封當以水助蘇具疏甫畢河水暴長
得旨封護國濟運金龍四大王見陳繼儒所
作傳

河干遺廟柳蕭蕭旗脚靈風盡日飄義激甘投汨羅水
心安不起淞江潮白衣殉國孤忠泯青骨為神萬古昭

正值陽侯肆威虐欲憑陰力莫漂搖

時河決
召伯鎮

擬復竹西亭

崑岡盡處結禪棲曾有孤亭號竹西歌吹歇來鐘梵靜
琅玕空後黍禾低廢興偏繫閑人念蹤跡惟憑老衲稽
預想他時登眺好南徐山色與闌齊

盤古冢

上古鴻荒事莫詢廟山遺跡未全湮神靈卓爾三才首
陵冢巋然萬劫新鑿竅誰教傷渾沌攀髯曾否有臣鄰
墓田信是揚州好先葬開天第一人

玉鈎斜

隋家宮闕冷煙昏瘞玉埋香迹尚存半世綠衣傷妾命

一杯黃土荷君恩河山僅換雷塘地環珮休悲月夜魂
比似蕭娘同穴葬不如生死向長門

京師王曇子手技歌

世事何從別真贗百戲尤為幻中幻吞刀吐火化魚龍
過眼都將泡影看就中惟有手技強妙處全由人力辦
京師王生挾技遊藏掖通神疾於電區區狡獪置勿論
盤舞椀珠奇獨擅一盤宛宛空際旋一竿裊裊風中顫
竿竿相續盤轉高欲落不落如繫絆椀置顛顛珠入雲
以椀承珠珠弗竄難之難者頰首迎其目在心不在面
當場自覺神思閑座客已令頭腦眩誰知餘技有楚餅
更使旁觀生駭汗初猶餅向掌中擎繼乃瓶從腕旁轉

腕非磁石餅非鍼何故相黏弗離判吾聞熟極使巧生
又聞自然由習慣當時初學此技來費盡精神幾昏旦
紛紛託業各謀生大則功名小衣飯生今有術干王侯
到處逢迎惟恐緩技中無用是雕蟲少日辛勤老貧賤
立冬日集抱山堂
年光荏苒涉清冬又向閑齋倚瘦筇簷外濃雲凝雪意
餅中殘菊駐秋容衝寒翮健輸高鴈覓句聲酸似老蛩
紙閣蘆簾吾亦辦披裘莫厭數相從

吟吟

尋詩非鬧事句向靜中收本不求人愛何曾刻意搜兼
葭秋水外風雪灞橋頭如此寂寥境蕭然自唱酬

閑醉

勞者不能醉既閑何用醒人休怪犀首天自放劉伶忽
忽忘冠幘昏昏枕瓦餅餘醒猶未解明月又中庭

聽馬北田彈天台引

夢裏天台身未到靈境未容凡骨造想君親過石橋來
滿把潺湲寫飛瀑人生遊歷皆前緣況希劉阮求神仙
不如閑窓調綠綺中有高山與流水一彈清客耳再彈
清客心瓊臺雙闕如窺尋松門九里響秋籟
桃花千樹鳴春禽翻思一首興公賦無此淵淵金石音

賈島天台山詩
山門九里松

掃葉煎茶聯句

睡起詩腸枯窗下無宿火值此落葉多

張世進

用以煎

茶可添薪慰家貧 張四科 擁篲策童惰階面除未休 世

進樹抄吹復墮撼撼踏有聲 四科 堆堆積已夥爐腹填

顛凹 世進 鐺脚安帖妥敲石旋吹噓 四科 飄煙漸孌娜

灰陷頻手添 世進 湯嫩早頤朶檜雨響蕭寥 四科 蟹眼

翻細瑣不雜生柴香 世進 幸免修竹禍學書儲無庸 四

科 煮酒計亦左何如試茗柯 世進 渴吻需正頗 四科

過員氏廢園

到此猶髻亂今來雪滿顛池荒石橋在樹禿野藤纏地
主經三世林亭更幾年門前古壕水誰繫赤闌船

冬白紵歌

寒女呵手鳴鴛機織作舞人身上衣銷夏灣頭遊幸稀

深宮漏長銀燭輝沉香火底冬權微彩雲片片當筵飛

金尊美酒如荊肥稱觴獻壽無停揮簷前忘却冰花霏

溫磨紅玉環四圍名高盟主功巍巍國中料無寒與飢

君王興酣語嬪妃累臣勾踐今放歸黃絲十萬輸吳畿

駱賓王詩振策下吳畿 一遊一豫其庶幾今我不樂仍歔歔無乃上

與天心違

炒米聯句

炒米見南史陳武帝紀

江南十月天烏糲刈千畝炊宜屑作糜蒸可釀為酒 張

世進 不若炒更佳香脆頗適口擇之既精繫摩之復搔

搜 張四科 拌以金星沙攪以青竹帚微煙升釜鬻繁響

驚戶牖 世進 雪花爆旋生火候看良久淨簞宜篋篩分

貯利瓦缶四科厥形肖字婁為用薄乾糗勻圓粒一一

造作節九九世進同旨蓄禦冬若焦飯遺母儲免呼庚

癸餐弗計卯酉四科噙聲細鳴牙掬食恒合手紅鹽略

和糝青豆紛雜糅世進苦茗潤最須甘錫配亦偶無虞

雀鼠耗曾裹南北走四科嗜可概婦孺貧尚辦升斗嘗

新臘雪前除陳梅雨後世進種豈燒田收法寧燧人受

雖不關三餐亦足徵大有四科

田家

三兩人家一徑微不成村落自相依稻花香入黃茆屋

桑葉陰遮白板扉煙火侵晨常對起雞豚向晚各知歸

卑棲莫道無幽致也有春來燕子飛

小除夕獨坐著老書堂作

傍節無賓客虛堂蠟炬明殘冬餘一日清夜又三更盤

飮羸妻事嚙呼稚子情紛紜何與我端坐數平生

立春日集竹西亭以日華川上動風光草際浮

分韻得草字

獻歲春始還築亭功甫了不因歌吹來未覺江山老岡

分西蜀支路接南徐道一覽收遙天百代隨去鳥身世

本悠悠登臨難草草東風又風人忍不開懷抱

上元夜山館聯句

高館張燈酒復清汪玉樞用年光流轉倍多情馬曰琯玉

山雅集人如舊張世進金谷遺音句早成馬曰璐無月

也珍三五節

陳章

當杯不計短長更

閔華

若為吹得浮

雲散

陸鍾輝

擬借春城弦管聲

張四科

分詠明人逸事得史癡翁送女

金陵史廷直羣以癡目之選得讀書壻苦無迎婦貲翁
乃出奇策弗令家人知時當三五夜月圓人亦宜詭言
踏燈出趣入聲令妻女隨行行及壻門適有酒與雞曰
此可合盃留女挈妻歸盈門百兩御結褵九十儀我自
用我法安用瑣瑣為日無難了事此翁癡不癡

雨後湖上看落梅三首

放棹閑看雨後梅半隨流水半蒼苔春來多少飛英會
此是東風第一回

羞與浮花浪蕊羣開時不肯到春分平山堂下遙看處
但有青松無白雲

紛紛香雪點春衣猶記前番白四圍催得玉妃歸去後
可憐湖上笛聲稀

重修慶遠府黃文節公祠堂為郡丞查儉堂作

實錄成貶涪江院記作投南荒南荒椎髻民識公忠與
良生處以館舍歿報以馨香能使百世後盡然為心傷
傷心蘇門四學士總坐清流遭貶徙文潛晚主崇福宮
補之老號歸來子秦七黃九最可憐飄零俱向殊方死
殊方之死賢於生造物正欲昌其名君不見媪相誅公
相逐二惇遠竄二聖辱是時黨禁盡蠲除刺史為公起

祠屋於今更閱幾春秋牆傾棟折龍溪頭宜州司馬志
復古慨然不惜千金修吁嗟乎當時斥公者祇以求富
貴富貴而今竟安在節義文章長不壞几筵時藝海南
香詞場尚說江西派司馬修祠存勸戒休言祇下論詩
拜

題石刻柳柳州像

遺像勒貞珉傳來墨搨新中朝員外職末路嶺南人功
業終何就文章信有神羅池逢伏臘想見走谿民

遊山四具

藤杖

瘦骨蛻黑龍

放翁詩一枝古藤如黑龍

天然去雕斲酒資挂百錢圖形

懸五岳扶老有奇功何愁路磽确

樓笠

織笠匪臺箬編以石翠樓重露巖畔雨側受松下風若
配高齒屐儼似玉局翁

芒屨

青鞵利平曠草屨利登涉絕巘蹴白雲空林踏黃葉轉
笑乖崖翁公餘偷步躡

張乖崖謝雲居山人草屨詩昨日公餘偷步躡萬端心緒憶天台

竹兜

橫板挂兩竹姜白石句厥製謂之兜曠無閉置苦輕免顛蹶
憂便可名四望何須引八騶

立夏前一日集榮木軒聯句

閨歲節序淹 張世進 顧免修四穀葉幄窓漸蒙 陳章 苔

茵徑全覆閑閑客繼來 閔華 摘摘門屢叩款語略暄寒

張四科 析義罔迷謬茶鼎鳴蠅聲 樓錡 吟硯安鳳味讀

畫別迂緩 世進 搗詞屏寒瘦於時涉清和 章 是日失昏

脊一陰始應律 華 九熟已登豆壓闌堆紅蕤 四科 綴樹

團白繡稚筍乍解綳 錡 乳飢甫脫殼櫻珠薦嘉實 世進

梅丸佐醇耐鮓魚斫海鮮 章 苦菜擷野秀木火有代謝

華 天地未交妬撫景惜流光 四科 促膝戀清晝攬結易

新賞 錡 遊盤追往覲綺望接郊垆 世進 蘭酌編園囿柳

隄早鶯飛 章 麥隴朝雉雒蹠躑噴青驪 華 飄揚飭舊袖

春去驚目曠 四科 老至感面皺且復耽朋歡 錡 高會喜

今又 世進

述遊十首

閑居十二秋老去甘蕩落豈惟髀肉生頗患筋力弱回
思少壯年道路吾所樂白浪片颿懸紅塵一鞭著始知
少歡娛但覺可悲愕當其困頓時曾悔出門錯境過不
能忘為詩存大略

江行殊快人放溜疾於箭正爾倚篷窓風勢俄頃變浪
頭高於山水色藍於靛檣欹露舟腹帆側掃波面云有
神物過爪鬣時隱現可憐如葉船詎堪尾一旋真令魂
魄消寧止頭目眩所恃惟長年淚下正如霰自分此生
中骨肉不相見陰雲漸收捲驚濤復平善酌酒拜江神

雙股尚搖頭從此罷川程不辭鞍馬倦

川行曉猶睡陸行多五更客子戀鄉夢僕夫促嚴程人
去店門閉路黑馬眼明暗水遠汨活曉星漸晶瑩未辨
徒御面但聞鈴馱聲行行村市近喔喔晨雞鳴
客途紆且長向晚策疲馬落日隱半規亂山圍四野林
深盜有無石臥虎真假道左問歸樵宿處路多寡荅言
郵亭邊只在前陂下破壁漏疎燈柴門短鞭打

當暑無晝行首途夜方中但愁早月落不知零露濃百
里未及半烈日懸高空蒸沙沙欲沸煉石石可鎔吻渴
若焰炙眼眇疑紗籠正喜涼雲來奄忽踰西東樹陰搖
扇客棚下賣瓜翁車中遙望見儼與閑仙同投店及午
晷矮屋無涼風手不停蠅拂鼻但聞馬通敢求蚤蟲避
恐與蛇蠍逢披襟門前立道絕行人蹤僕夫前致語天
氣方蘊隆明發須更早就枕休從容

憶昔建子月行近潼關口漫空寒雲飛捲地朔風吼凍
面裂作瘡冰鬚結成絡遍體爲之僵重裘失其厚此際
馬馱人那記鞭在手吾弟先啟行村店待已久呼童掖
而下植立不能走坐我折足牀飲我軟脚酒移時始陽
回四肢乃吾有壯日猶不堪況今成皓首

寧作雪中行慎莫行雪後我曾坐筍輿趣

入聲

令趁晴

走彌望無高低何處別阮阜但履前人蹤未敢稍左右
雪深輿如箕自入不須帚停輿掬出之一里嘗八九念

此昇者勞實由我之咎無端事遠遊累彼肩重負努力
到前途勞之以村醜

地近信陽州厥名李家砦踞兩省之交

楚豫

處萬山之內

孟夏駐此閒解鞍息罷

平聲

憊飯餘負手行周覽尋勝

槩店後一溪橫溪邊一峰怪拔地百餘仞上有城堡在
隱隱露門徑微微羃煙靄云是闖獻時居民守險隘我
欲縱登眺攬衣撥荒蕨主人從後來謂客休冒昧舍旁
有老婦生子十六歲昨日登此山結伴斫柴賣忽然腥
風起有虎大於牯銜之上高峰輕若拾一芥同伴倉皇
歸告人語艾艾鳴鉦集比鄰各各操兵械尋蹤入深林
虎見逸而邁僅剩一足存其餘盡吞噉說罷挽我還未

晚雙扉閉橫以巨木梢拄以大石塊始知虎夜遊往往
至門外扃閉偶不嚴雞豚必罹害人世多畏途巖壑差
可避誰知煙霞中又苦遭此輩明發語僕夫此地烏可
再

憶奉上官檄尅期赴金陵油油暮雲合霎霎秋雨零宿
處尚十里進退兩不能道旁一間屋徑往叩其扃有叟
已高臥敲火旋呼燈索飯無一盃覓酒無半升衣濕燎
土銼馬飢齧窓櫺擁被面向壁瑟縮如凍蠅僕隸席地
坐穢雜寧容憎門隙隱隱亮簷溜稍稍停肩輿急上道
行潦正縱橫屢經泥滑澆難禁睡曹騰卑官不可爲此
雨乃我懲何時脫塵鞅翩若離鞬鷹

塵鞅幸得脫粗了婚嫁緣武林常夢想詩友適言旋太
遂攜龍尾硯同上鴨嘴船沿途試蠟屐共案分吟箋送
我孤山住兼旬飽雲煙尋僧南屏麓曳杖西湖邊是時
中秋後正值觀潮天眺覽至一再氣象真萬千平生所
閱歷豈無好林泉大抵多涉獵何曾久流連茲遊信冠
絕不啻瀟灑仙年齒非少壯腰脚未彎跼老子興不淺
名山性所便從今樂閑放肯復躋危顛

四月十二日夜起大月

蝙蝠交飛亂撲簷無眠短夜亦厭厭一方月色三通鼓
人在虛堂自捲簾

戲題鍾馗詩集圖

此圖命意吁可怪終南進士餘筆債閑結吟朋作高會
于思面目何相類大都眊毳如君輩生平秋卷人不愛
姓名曾擯孫山外今日氣粗言語大暗中仍恐揶揄在
馗兮倘欲銷壘塊筆鋒邴如劍鋒快況君鬼氣塞腸胃
作詩定是昌谷派鼓吹休明聽當代阿婆塗抹誰迴睞
惟我共君堪便戒皮襲
美句

盧雅雨先生少子模十歲能書大字為長句贈

之

八法居然見老蒼豈知卅角正年芳眠時定遇書裙客

座後應誇掣筆郎

東坡詩今夜
相逢掣筆郎

研墨寫來箋尚濕捲簾傳

看日初長家聲自是岡盧舊文采相承奕葉光

東綠淨老人

許夫人
徐德音

才名夙昔著江東
琢句紋窓老更工
直欲女中爲博士
豈惟林下見清風
玉臺新詠誰堪和
金馬名流漫自雄
敢望青綾施坐障
分題儻許遞詩筒

和作

徐德音

時清不合隱牆東
詞賦偏能晚歲工
要使中流憑砥柱
豈甘屈曲似屏風
當年抱玉空朝楚
舉世何人爲薦雄
頭白諸生推祭酒
如何只戀釣魚筒

馬半查六十

閑身鎮日擁書城
雙鬢曾無白髮生
永以弟兄爲性命
不將詞賦博科名
檐扉祇隔三條巷
筆硯相依十載情

我未全衰君正健
年年花月待酬賡

方西疇六十

石壁村中是舊溪
身居華屋志幽棲
情關南阮時推解
舌類東方語滑稽
袖裏摩娑多古玉
眼前拈弄即詩題
年年紅藥爲君壽
長向西疇曳杖藜

荷亭

薄暮荷亭上
憑闌喜客同一池
舒淨綠幾朶
鬥生紅報響
聲聲雨吹香
面面風蕭然
遊舫外魚戲
自西東

曉眠

歸來記得月朦朧
一覺譙門漏點終
不煖不涼山枕上
半醒半困雨聲中
心灰久息聞雞舞
耳重原無聽蟻聰

除却奔馳與昏夢曉眠滋味讓衰翁

秋日登竹西亭望江南諸山

虛亭俯秋原百里落眉睫青青江南山臨水如欲涉東
去連海門西顧指建業嫵媚螺黛橫屈曲屏風疊遠帶
夕陽明高與晴空接面目祇遙看林巒未登躡煙波半
日程何難理輕楫會當乘商飈峰峰踏黃葉

題王履若溪山草堂圖

分得
外字

窓前山作屏屋上樹成蓋詩情水聲中世事柴扉外何
曾離人寰自然絕塵瑳他時如買山樣本視圖繪

枝上村新闢竹徑

入門非舊路竹裏徑深深墜籜看初覆狂鞭喜未侵蒼

涼穿夕照曲折赴秋陰從此求羊侶時攜拄杖尋

秋宵獨坐

客去門初掩心清睡未能蟲聲催夜漏池影浸秋燈酒
戶年來減詩情月下增奚童無一事莫怪喚難應

題漸江梅花石屋圖

老僧清入骨落筆無纖塵寫梅不作花畫屋不著人稍
添瘦竹葉俾與孤芳鄰匪貌寂寥境自傳冰雪真冷極
轉生艷空山含古春

秋窓

竟日攤書地一窓秋意饒晚涼通蟋蟀夜雨隔芭蕉月
皎燈光暗更長曙色遙時聞敲落葉坐歎髮蕭蕭

秋寺

蕭寺乘秋入松陰古殿寒西風傳粥鼓落葉上蒲團氣
肅安禪早僧稀結夏殘木犀香發處真諦悟非難

野橋

略約橫溪面粗疎駕木成於人豈無濟在野不知名窄
礙高軒過低容小艇撐杖藜須子細秋水夜來平

野渡

隔岸一舟檣相望立水濱欲投溪外路須待過來人莫
怪少行客祇緣非要津請看爭渡處車馬正紛綸

水村

野水正空濶人煙忽一村稻花皆遶屋荷葉半遮門生

計綸竿足比鄰鷺鴨喧遙看燈影亂過艇泊黃昏

山郭

巖壑周遭處千家亦有城縣庭蒼鹿入坊巷白雲生居
者習樵獵古來無戰爭蕭然門早閉贏得長官清

秋草

清霜初隕處碧色未全黃落葉荒園裏西風古道旁老
蛩棲暮雨飢馬齧殘陽迴憶萌生候春暉不可忘

九日竹西亭登高

得客字

蜀岡蜿蜒來至此勢軒闢爽節地最宜快晴天不惜還
攜茱萸觴緩引桄榔策繞亭霜葉疎滿眼秋空碧百年
幾寒暑一瞥成今昔那如江上山長閱人閒客雅歌且

為歡光景休虛擲試問杜司勳飛鴻去無迹

晚菘

赤莧青葵後吳菘入饌香風霜經已飽滋味老逾長日
課園官送時留野衲嘗臈神休見訴久謝束修羊

甲戌初冬重觀九日文醮圖不禁歲序遷流友

朋凋謝之感各系以詩

圖成於癸亥秋予以乙丑始入會故圖中無子像

當時蹤跡判西東九日清歡未及同一自招攜偕入社
十年鬚鬢已成翁詩情酒態丹青裏宿草新墳涕淚中
此軸不堪頻展看人生禁得幾秋風

寒夜題程星緯遺照

少同筆硯老同官未改儒生氣味酸此際故人呼不出

一燈如豆展圖看

題張白雲先生棲霞志略後

先生避世處尚友明徵君周室有義士堯時作外臣巖
壑細搜剔廢興窮討論緬彼六朝迹賴此一冊存雖非
西臺記儼是南村人我昔瘦筇歷頗恨往蹟湮他年入
山去攜讀秋樹根

雨窻聞鴈

嘹唳征鴻送遠音更添疎雨破窻侵懸知翅濕飛難進
但覺雲低響易沉遞入五更驚客夢和成一片攪秋心
淒涼莫遣愁人聽正恐無愁也不禁

夜歸

清談興未闌遠寺鐘初撞去聲歸去不籠燈月滿條條
卷

漢玉磨兜堅歌

誰思守口如守餅寸玉琢此三緘形稱名古奧頗費解
意在遠法金人銘金人銘誰不見無奈樞機疾於箭古
銘過眼或忘心雜佩隨身常覲面方規圓璧羣摩抄不
如寶此爲益多弗捫爾舌徒玩弄磨兜堅其如爾何請
看玉上斑斕幾點血縱有他山之石焉可磨

寄天竺大恒上人三首

南屏山下別南能蕭索離懷與歲增自愛詩無蔬笋氣
非關投老欲依僧

西湖十日寄閑身方外惟師氣味親記得斜陽呼小艇
鷺鷥羣畔採秋蓴

不依處士守寒梅

師舊主孤山之聖因寺

天竺山頭講席開桑下若

無三宿戀一杯還望渡江來

梅泚至自京師集榮木軒

分手還握手均此寒齋中一尊猶昨日五載如飄風君
歸顏尚壯我老真成翁始知榮悴殊不在年齒同

君與予同癸酉

平生互相較託業俱雕蟲螢乾尚几案鴻飛倏西東
蹤跡雖小異遲暮仍相逢儂指舊吟侶幾輩埋蒿蓬合
并誠匪易臭味期有終相留卒殘歲渡江休怱怱

滑語

黃河冰上行馬蹄苦竹岡頭鳴竹雞辯士當筵舌炙輶
佳人出浴膚凝脂

澀語

古鍼鏞孔穿不入古劍戀室拔不出樊宗師文東野詩
青橄欖漿檳榔實

夕陽

晨曦纔見氣滄涼瞥眼駸駸下短牆急景欲催天地老
浮生猶爲利名忙隨來賈客高帆上遮向長安大道旁
如此光陰如此度揮戈誰說事荒唐

聽麗雅上人

印誥談黃山之勝

出家雲海裏寒暑十年更巖壑胸中貯煙霞舌上生探

奇原夢想說險已神驚若有山中分他時導我行

題黃遵古山莊雪霽圖

行菴作

山雪夜已闌山扉朝尚鍵晨曦耀林巒寒色靜雞犬何
來抱琴翁路向溪橋轉畫師白描手展玩當歲晚閑房
萬竹低積素一庭滿便覺此山莊去人殊不遠

寒夜與梅泚話別

軟紅纔拂後又上渡江船交誼老來篤歸心歲暮堅漏
長杯絡繹燭短語綿連此別無多日相逢又判年

除夕口占示八弟

小市人稀雪滿天梅花開近草堂前家常盤飮新蕩酒
弟勸兄酬又一年

著老書堂集卷之四



